



# Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail: tiryimyim@gmail.com

TAPAK 3

Yangia anidakangma :

f Tir Yimyim

Instagram tiryimyim@aolima

YouTube tir yimyim

TAPAK 8

INDIA teloktep ya assembly elections  
atema masu: Jairam Ramesh

Jaiswal-i Test asaya nung tang mezung-  
buba double century yangluogo



VOL. XXI ISSUE NO. 112 (ADOK 112) DIMAPUR AMUNGNÜ (SUNDAY) TSÜKLAI (FEBRUARY) 04, 2024 ₹ 5.00

## Ato Kilonser Modi ananü atema Assam tonga aruogo

**Guwahati, Tsüklai/February 03 (Agencies):** Ato Kilonser Narendra Modi anogo ana atema Honibarnü Guwahati tonga aruogo.

Iba mapang pai BJP indang state core committee ajurutsü aser sen crore 11,600 jungnüa indang terenlok mapa semzüksütsü.

Modi ya Odisha nungi nikongdang 6:30 ako meta Guwahati nung aliba Lokpriya Gopinath Bordoloi International Airport tonga aru aser Koinadhora State Guest House bushia ao.

Ato kilonser ya Governor Gulab Chand Kataria, Chief Minister Himanta Biswa Sarma, state minister tem, civil aser police ketdangsür temi agizüka liasü.

PM Modi-i aonung BJP indang state core committee ajurua party inyakyim indang jembishini akatsü, ta Sarma-i Hokulbarnü shia liasü.

Modi-i Deobarnü 11:30 ako nung Veterinary College Playground, Khanapara nung lokti senden ka nung jembitsü aser iba tesem nungi pai state aser central project balala semzüksütsü.

Temeshi tesemtem semdangba nübür nem tematiba jenjang nung 'amenities' agütsütsü nükjidong nung PM Modi ya Assam-i arur.

Iba mapang pai Maa Kamakhya Divya Pariyojana

(Maa Kamakhya Access Corridor) atema nungshilong azungtsütsü, koba Prime Minister's Development Initiative for North Eastern Region (PM-DevINE) scheme kübok inyaksü.

Iba ya ajanga Kamakhya temple semdang nem 'world-class amenities' agütsütsü.

Ato Kilonser Modi-isa sen crore 3400 dak tema lenmang balala yanglushitsü atema project tem tenzüksütsü aser yangji South Asia Subregional Economic Cooperation (SASEC) Corridor Connectivity nung shilem ka ama lenmang 43 aser apu 38 tajungba kuma yanglushitsü.

Ato kilonseri Dolabari nungi Jamuguri tashi aser Biswanath Chariali nungi Gohpur tashi 4-lane project ana semzüksütsü.

Item project yagi Itanagar den lenmang tesendaktep tajungba akumtsü aser region nung rongsenketzung terenlok tajungba akumtsü.

Region nung saisapong tsütsü sempet aliba anitentsü asoshi ato kilonseri state nung sports infrastructure tajungba kumdaksütsü project tem indang nungshilong azungtsütsü.

Item rongnung Chandrapur nung international standards sports stadium ka aser Nehru Stadium ya FIFA standard football stadium jenjang nung yanglushitsü dena lir.

## Advisor Yhome-i shisaliok atema shisadokden senden amen

**Kohima, Tsüklai/February 03 (TYO):** Advisor, School Education & SCERT, Dr. Kekhrielhoulie Yhome-i anü 11-Northern Angami-II Assembly Constituency kübok putu menden, school management committees, kaketshir aser government school tesayurtem den shisadokden senden ka mena liasü.

Iba senden ya NAPO Hall, Chiephobozou nung Directorate of School Education (DoSE) aser District Education Office nungi ketdangsürtem dena amen aser iba mapang open schools densema tila tanur timbai shisaliok angutsü lenpa-lenre bushia liasü.

Constituency nung tayongzükba balala ajangtetsü, ki o jen tajungba kuma yanglutsü aser education system ajunga nung renloksü asoshi lokti tentet balala tsungta teka amteper inyaksü jembia liasü.

Iba senden nung jembidang, private school tem den medemdangra government school tem nung aliba tesayurtem ya tajungba lir, ta Advisor Yhome-i ashi.

Kaketshirtem government school nung tenüng züluoktsü asoshi nüburi temulung lemtetsüsa inyaksüla aser iba

atema department, tesayur aser nübürtem lungjemer inyaksüla, ta pai ashi.

Pai nübürtem dang tesayur temi ajuruba timtem aroka shisadangtsü ajungshi aser ki o jen tajungba kumdaksütsü asoshi külemi inyaksü kanga tongtipang ta ashi.

Tesayurtem kumzükba ayutsü aser parnok alitsü asoshi nübürtemi teyari agütsütsüla aser yangji arogo, putu menden aser CSOs shilema lir ta Yhome-i ashi.

Government school tem tajungba kuma yanglutsü atema nübürtem tongtipang teinyaksü lir, ta iba senden nung Commissioner and Secretary of SCERT, Kevilenue Angami-i ashi.

State tesem ajungalen tesayurtem shidak lemsatsütsü asoshi department-i inyakdar, ta lai metetdaksü.

Tang court-i totuyuba agüja aliba ama VIPs nem tesayur nungloksüba ya tai lir aser iba amala osang department nem metetdakjang, ta lai ashi.

School terenlok atema Village Development Board (VDB) nem senotsü terara agütsür, anungji item sen amshia putu menden aser VDB ajanga school nung tzi aser electricity ama nungdakattem anepalua agütsütsüla, ta laisa ashi.

## Opposition maliba sorkari Naga political solution tekeraba nung aginer: CM Rio

**Kohima, Tsüklai/February 03 (TYO):** State nung opposition maliba sorkar ka kumtetsü asoshi legislator 60 külemi lungjemba ajanga Naga nungter dak tangatetba shisatsü tain ama aliba aser yimjung, terenlok asoshi Naga Political Issue tekeraba nung angatettepsü tejangraba aliba sayur, ta Nagaland Chief Minister Neiphiu Rio-i tanü ashi.

February 2023 state election agiba sülen tekeraba nung yimtenren tsütsü tangatettep kati arutsü jangra aliba political party balala aser Independent MLA temi sorkar nungita yaritsü mulungtet, ta pai ashi.

Iba yagi Naga nungter teintet ama angatetba sayur aser tesunep aser telungjemji tongtipang ta tatishitsü sayur aser tekeraba nung yimten tebilemstü angatettepa terenlok nung aotsü jangra aliba sayur, ta Rio-i Sechüma Mechü Zie (Play Ground) nung sentong balala agiba sülen sentong tuluba nung jembidang ashi.

Naga nungter ken o mebeneteti

aliba mechi Nagaland tejakleni renloka moteter aser lenla balala nung atsungzüka aor, saka tensa tajungba akumba ajanga sorkari lenla ajak nung terenlok bener arutsü meranga inyaker, ta pai ashi.

Iba anogo Chief Minister Rio aser Minister, Horticulture & Women Resource Development, Salhoutuonuo Kruse nati Kohima district kübok Sechü-Zubza nung National Highway 29 tema kilometre trok shi pilar aliba Sechüma yimdaki tepelatsü osang bener aruja liasü.

Iba mapang Rio-i Sechü (Zubza) nung Mera-Sechü-Rau Seyie Complex indang nungshilong azungtsü aser Sechüzo Nourhe Kromia Badze aser Sechüma Mechü Zie semzüksü. Minister Kruse-ia MGNREGA kübok yangluba Sechüma approach road semzükja liasü.

Sorkari senotsü teyari agütsür, saka yimtsüng nung lenirtem aser yimtsüng nung alirtem lungjemba aser amalitep akaba ajanga dang nübürtem

asoshi project tem takok ngua inyakter, ta Rio-i ashi.

Sechüma ya yimtsüng tilaka lir saka yimtsüng nung lenirtemi lungjemer project balala inakba nung telungjem aliba aser nendaka inyakba sayur, aser yamaji danga yimtsüngtemia inyakra, state nung terenlok jenti lila, ta pai ashi.

Sempet tajung aliba lanurtem temaba jenjangi ajungkettsü aser Naga nungter indang sobaliba wazüka ayutsü nungdak ta angateta, par sorkari 2003 nungi tenzüka lanurtem asoshi saisapong asoshi ki o jen yanglutsür aser sapang agütsür, ta ashi.

Music aser arts temaba jenjangi ajungkettsü aser sobaliba wazüka ayutsü atema mera balala agir, ta pai ashi.

Paisa tang telidak Asia Music Summit aser March ita North East Olympic aser danga national aser international sentongtem densema taküm state nung tongtipang sentong balala ayongzüka agitsü aliba indanga sangdong.

## Kohima nung 19 buba AONEI mungdang tenzükogo



De Oriental Grand Hotel, 19 buba Annual Conference of Association of Oncologists of North East India (AONEI) sentong alidang MLA Dr Tseilhiutuo Rhutso-i iba mungdang indang nunguo kaket sayatsüba noksa nung angur. (Kohima, February 2, 2024)

**Kohima, Tsüklai/February 03 (TYO):** Anogo asem atema 19 buba Annual Conference of Association of Oncologists of North East India (AONEI) sentong de Oriental Grand Hotel, Kohima nung 'Expanding horizons: What's known & What's new' omen nung ajemdaker Hokulbarnü tenzükogo.

Iba sentong nung tesemdang tongti ama jembidang MLA Dr Tseilhiutuo Rhutso-i ashiba agi, iba mungdang ya state aser region nung cancer tashidak agi shirangertem tajungba anepalutsü, facility tajungba agütsütsü tejangraba aliba kuli sayur.

Iba mungdang ajanga ajak shisatsü nung ajangzüksü aser lanurtem dang shisatsü tajungba lemsatepsü aser shiranger nem anisungzük aser taneptsü agütsütsü imlar ta pai ashi.

Cancer anepalutsü asoshi ajak lungjemer inyaksü nungdaker aser iba mungdang alitsü Kohima shimba ya kanga tongtipang lir, kechiaser linük nung cancer tashidak timtiba aliba state tem rongnung Nagaland ya jenjang 11 buba nung lir aser alima nung nasopharyngeal cancer tsütsü tanabuba jenjang nung lir.

Cancer anepalutsü asoshi Nagaland nung takotet aser lanur aika lir, saka facilities repringdangra Northeast region nunga dangar meneptsü mapang talangka lir, ta Dr Tseilhiutuo Rhutso-i ashi.

Anungji ajak lungjemer inyakra tejakleni aotsü aser cancer tajungtiba nung anepalutsüsa facilities bener arutetsü.

Iba mungdang nung shisatsü lemsatepba ajanga cancer tashidak ya danga yimra ama anepalutetsüsa jenjang kati anir aotsü imlar, ta pai ashi.

Dr Rhutso-isa iba mungdang indang nunguo kaket sayaja liasü.

Tetushi tesemdang Commissioner & Secretary V Kezo-ia iba mungdang ajanga state aser Northeast nung cancer anepalutsü asoshi nungdakba tajungzük bener arutsü imlar ta ashi.

Nagaland nung cancer tashidak anepalutsü asoshi technology amshitsüba densema teinyaksü jenti lir, ta pai ashi.

Cancer tashidak anepalutsü asoshi Northeast nunga tanem tanemi tajungba akumer, anungji tajungtiba nung anepalutsü ajungshir, ta pai ashi.

Asenoki cancer samatsütsü

makoktsü saka iba tashidak agi nübürtem nem takoksa aser timtem agütsüba ajemdaksütsüsa lungjemer inyaksüla aser kera cancer putetsü aser achi-ajemba indang awareness agütsütsüla, ta pai ashi.

Kezo-isa AONEI 2024 Newsletter sayatsü.

AONEI tir Dr Jadunath Buragohain-i sentong nung tir o jembia aser Director, Tata Memorial Hospital Mumbai, Dr C S Pramesh ajanga 'Reducing disparities in cancer care' ontük nung ajemdaker o jembia liasü.

AONEI ajanga Padma Shri Dr Ravi Kannan tushia liasü, shibai cancer tashidak anepaluba nung shilem agiba atema Raman Magsaysay Award 2023 sempet agüja liasü.

Iba sentong ya Dr Theyiesinuo Keditsu lenisüba kübok agi, kong Keneisedenuo Zatsu nungeri ken ka aten.

Organizing chairman AONEI 2024 Dr Vinotsole T Khamo-i pela agizükba o jembia aser AONEI secretary Dr Abhijit Talukdar-i secretarial report agütsü.

Maneni Organizing co-chairman Dr C Wathsutho Nyuthe-i melepzung o jembia liasü.

# Dimapur nung Arabic restaurant ka lapokogo



**Dimapur, Tsüklai/February 3 (TYO):** 'Al Arabia' ta nungja agütsür Arabic restaurant ka Honibarnü Darogapathar Village, Dimapur nung Muslim Council Dimapur (MCD) tir A Rahman-i lapoktsüogo.

Restaurant lapokba sentong nung Al Arabia kibur Sentirenla Jamir-i la Qatar nung küm ter shi aliba mapang koda Arabic chiyongtsü kanga meima aküm iba indang lemsatepba den Al Arabia lapokba ajanga kidang Arabic restaurant ka lapoktsü atema la nukjidong aliba

atakokogo, ta ashi.

Restaurant kibur nem tenüngsang agütsüba mapang A Rahman-i, Al Arabia ya tanga poksüngdak dang nungi khenyongi balaka kong Arabic chiyongtsütem angutsü, ta ashi.

Paisa, Naga nungertemi Muslim nung chiyongtsütem kanga sapur aser Dimapur yimti aser temeket nung muslim nung indang restaurant tem nisung aikati semdang, ta ashi.

Naga chef temi halal chiyongtsütem agütsüba jangjashitsütsü aser officially

certify sütsütsü asoshi MCD-i halal chiyongtsü tem ayoktsü atema restaurant kibur nem kuli kaket ka agütsüogo.

MCD-i, chiyongtsü meimertem ajak mulung nung terata aliba iba kuli kaket janga jangjashitsüogo aser iba restaurant nung Arabic halal chiyongtsütem ayoktsü ta shiogo.

Al Arabia ya halal chiyongtsü ayokba restaurant ishika rongnung ka lir.

Menu nung chiyongtsütem ya sen 220 nungi tenzüka 1100 tashi agi angutsü.

# Tripura: BSF gari tailaka nung ganja bener lia apu

**Agartala, Tsüklai/February 3 (Agencies):** Honibar aonung Tripura Police-i, Dhalai District kübok Durga Chowmuhani yimtsüng nung Border Security Force (BSF) indang taila gari ka sot aser ganja sen lakh 76 alang pua liasü.


Police source kati ashiba agi, itangitertem nung osang tejangja ka angazükba sülen Kamalpur police station nungi sepaitemi meita aoba sentong

ka ayongzük aser SPO camp anasa Durga Chowmuhani nung temulung melemi bilemba green-clad Bolero ka sota liasü.

"Osang tejangja ka angazükba sülen sepaitemi BSF gari mesüker aliba gari ka temulung melemi sota liasü. Ajisüaka gari anisang aser pa den mener alisang naprongla gari toktsür jena ao kong tenokdangba agütsür aliba oset bener liasü," ta sepai kati ashi.

Tenokdangba agütsür aliba oset ngutetba indang jembiba mapang pai, "gari ya Ambassa tesem nungi Fatikroy, Kumarghat, aser Durga Chowmuhani süia aru. Gari kanga junga asadangba sülen ketdangsurtemi talep 41 nung sepet aliba ganja seret 381.600 nguteta liasü, koba shishilembadak sen lakh 76 alang asütsü. Temesepeba mozü bener aliba gari ya police station nem bendanga agütsüogo," ta ashi.

# Assam Rifles-i inyakyim balala ayongzüka agi



**Dimapur, Tsüklai/February 3 (TYO):** Brigadier Jai Bhagwan Singh Rathi, Deputy Inspector General, HQ 5 Sector, Assam Rifles den Major General Vikas Lakhera, AVSM, SM, IG, IGAR (N)-i February 3 nü Kohima College, Kohima Science College, Sazolie College aser Oriental College nungi kaketshir 20 NIT Tour tenzütsüogo.

National Integration Tour aoba kaketshirtem yagi tour mapang Indian Military Academy (IMA), Dehradun aser Kumaon aser Naga Regimental Centre, Ranikhet semdangtsü aser Indian Army,

parnok indang infrastructure, training aspects aser tanga sentongtem indang angazüktsü aser iba ajanga parnok armed forces nung adentsü atema ajungmesotsü.

Kaketshirtem yagisa linük yimtiba Delhi semdangtsü aser linük yimtiba nung sobaliba, monumental structures aser libaliro ajangshitsü.

National Integration Tour nukjidongji nüburtem aser Security Force tsüngda tesendaktep tashi taitba kümdaktsütsü asoshi lir aser iba sentong kübok North East nung kinük nung aliba kaketshirtemi

pei talidak arrtsü adena oa tesem balala semdanga tajangshitem aika angutsü.

Kasa mapang nung Assam Rifles-i kinük nung aliba tanurtem atema Educational Tour ka ayongzüktsüba kübok anogo trokbuba nung Inspector General, Inspector General Assam Rifles (IGAR N), Kohima den sensaksem sentong ka ayongzüka agiogo. Iba sentong ajanga lanurtem aser security forces tsüngda tangatettep tajungba aser tesendaktep tashitaitba kümdaktsütsü asoshi sabang tajung lapoktsüogo.

# Chumoukedima DC-i tekümdangtsü metetdaksü

**Dimapur, Tsüklai/February 3 (TYO):** Dimapur-Kohima 4 Lane (Package - 1) aser Dimapur Bypass (Nagaland tsütsü), temzüng ozüing alema ki, jen yangluba, litem ayokdak amenokba, culvert blockages, median tem raksatsüba aser temenok agüja alizükba nüburtem indang ali atsüngba amala inyakyim balala koba ROW encroachments den sendaktepa lir iba dak sendakba nung Deputy Commissioner, Chumoukedima Office-i tashishiba aika angazükogo, ta sangdong ka ajanga metetdaksü.

Iba amala temzüng ozüing anema inyakba inyakyimtem ya National Highway Act aser 'The Nagaland Eviction of Persons in Unauthorized Occupation of Public Land Act 1971' kübok merenshitsu langa lir. Iba den bendenloksema ozüing alema lenmang nung tetsükdaksü

toktsüba ya nüburtem atema lendong, gari senzusenpong nung tetsükdaksü adokdaksür aser lenmang raksatsür.

Iba dak sendakba nung Highway nung ali atsünga aruba nokdangtsü atema, nija atema aser shishilembatsü atema kiojen kecha meyanglu tsüngda Deputy Commissioner, Chumoukedima Office nungi N.O.C meshitsüla.

District Administration-i mapangshia iba tesem meita aotsü aser ozüing alema inyaktertem anema jenjang tapet agitsü.

Maneni nüburtem dang tetuyuba sülen tashi anga anidaktsü aser Highways atsünga aruba nungi jenbotsü aser nüburtem ajangzüktsü aser kümzüka toktsütsü atema takok tashi District Administration den teka amteper inyaktsü ayongzükba kasa sangdong ajanga metetdaksü.

# Kangpokpi district nung prangbong injang ngutet



**Imphal, Tsüklai/February 3 (Agencies):** Hokolbarnü Manipur kübok mepetmesü adoker aliba district ka nung tesem kar meita aoba mapang prangbong aser injang aika ngutetogo, ta police sangdong ka ajanga Honibarnü metetdaksü.

Osang tejangja angazükba sülen Kangpokpi district police aser Assam Rifles na longjemer New Keithelmanbi police station kübok Joupi hills anasa tesem kar meita aoba mapang bomb densema prangbong injang aika nguteta liasü.

Kangpokpi district nung ya Kuki-Zo kintem timba alir, shirnok tang state kübok lenden nung alirtem den mangatettep atulu adoker lir.

Sepaitem yagi meita aoba sentong ya 6 ako shi nung tenzüik aser 8 ako nung tembanga liasü. parnoki M16 ka den magazine, 9mm pistol ka den injang asem aser 36 HE hand grenades ana nguteta liasü.

Prangbong indang aser bomb ya ken o dak sendaka aliba police station nem bendanga agütsüogo.

# Tripura: TBSE tir anema ken o benok

**Agartala, Tsüklai/February 3 (Agencies):** Indigenous kaketshirtem temeden mezüngmeshiba aser iba dak sendakba nung aibelenba atema Tripura Board of Secondary Education (TBSE), tir Dr. Dhananjay Ganchowdhury anema ken o ka benokogo.

Tashishiba nung ashiba agi, pai Bengali script nungi Kokborok oshi indang subject ka kaketshirtem nem kangshia langzüdaktsütsü meranga liasü.

Twipra Student's Federation, koba North East Students' Organization (NESO) nung densema lir iba lokti tentet tatong tir John Debarma-i tashishiba ka Tripura State Human Rights Commission (TSHRC) nem agütsüba sülen ken o ya New Capital Complex Police Station nung benoka liasü.

FIR nung John-i ashiba agi, TBSE-i script ya Kokborok oshi nung amshitsü atema shia mali.

Anungji script kakaketshirtem nem kangshia züngdaksütsü tim masü.

FIR nungsa Tripura Chief Minister, Dr. Manik Saha-i,

Kokborok oshi indang telangzubattem Bengali script nung zülutsü atema tetuyuba agüja mali ta ashiba shisema lir.

Iba den bendenloksema Twipra Student's Federation-i 2022 küm September 22 nü Kokborok oshi question paper tem Roman aser Bengali script naprongla nung print asütsü temepeshiba ka benokogo.

John Debarma-i ashiba agi, English aser Bengali medium school tem nung kaketshir shilem 99-ibo Roman script nungang zünger.

Paisa, TBSE-i kaketshirtemi memulungba script ka kangshia mezüngdaksütsüla, ta ashi.

1991 küm Shyama Charan Tripura lenisüba nung Script Selection Committee aser 2005 küm Pabitra Sarkar lenisüba nung Tripura Upajati Bhasha Commission-i nüburtem timbai Roman script-ang sapur ta ashiba FIR nung shilem aliasü.

Ken o dak sendakba nung John-i Dr. Dhananjay Ganchowdhury anema jenjang tapet agitsü asoshi temepeshiba ka agütsüogo.



February 03, 2024 nü New Delhi nung Commonwealth Legal Education Association (CLEA) - Commonwealth Attorneys and Solicitors General Conference (CASGC) nung Ato kilonser Narendra Modi, Chief Justice of India, D.Y. Chandrachud, Supreme Court judge Justice Surya Kant aser Attorney-General, R. Venkataramani nung tangokba noksa nung angur.

### INDIA teloktep ya assembly elections atema masü: Jairam Ramesh

New Delhi, Tsüklai/February 03 (Agencies): Congress party-i, opposition INDIA teloktep ya taruba Lok Sabha elections atema dang lir; iba teloktep ya state balala nung assembly elections atema masü, ta metetdaksü. "Opposition INDIA teloktep nung party 27 longjema dang lir aser maneni onoki longjemer raratsü," ta Congress lenir, Jairam Ramesh-i metetdaksü. Bihar Chief Minister, Nitish Kumar-i aniba JD(U)-ibo INDIA teloktep toktsür BJP-i aniba NDA nung denogo.

Kumar-i BJP den senteper sorkar tasen kümogo. Congress general secretary, Jairam Ramesh-i, tang Rahul Gandhi leniba nung agiba 'Bharat Jodo Nyay Yatra' ajanga 2024 general elections nung kongshitsü, ajisüaka iba ya election nüboyim masü saka yimtenren sentong ka lir, ta metetdaksü. Ramesh-i, "INDIA teloktep ya general elections atema dang lir; West Bengal, Maharashtra mesüra state kar nuung assembly elections atema masü. Ajisüaka Maharashtra assembly

election nungbo Congress, NCP aser Shiv Sena longjemer tokteptsü," ta metetdaksü. Hokolbarnü West Bengal kübok Birbhum district nung osangbenertem den jembidang Ramesh-i, BJP kodanga meyaridangba party ji Congress dang lir, ta ashi. Paisa, "INDIA teloktep ya BJP aser RSS tangatetba anema nokdaksü atema lir; linük temzüng aser democracy amokmeren jenjang ka nung lir, anungji itemji kümzüka ayutsü atema BJP tamakok ngudaksütsü nüngdak," ta metetdaksü.

### Medical mapa ya sen aazükba masü saka tenzükba mapa lir: Mandaviya

Jodhpur, Tsüklai/February 03 (Agencies): Honibarnü Union Health & Family Welfare Minister, Mansukh Mandaviya-i, medical mapa ya sen aazükba mapa ka masü saka nüburtem tenzükba mapa ka lir, ta ashi. Paisa, doctor ka teinyaktsü shilemji tekülem kidang putir kati inyakba amai lir, kechiyong doctor temi hospital nung shirangertem anepalur, ta ashi. AIIMS, Jodhpur nung 4buba Convocation sentong nung jemidang pai iba o ya jembia liasü. Honibarnü iba sentong nung medical kaketshir 22 nem award agütsü aser UG, PG, Nursing aser super-specialty students 780 nem degree agütsü.

Union Health minister-isa AIIMS, Jodhpur den Bilaspur, Bhubneswar, Nagpur, Deoghar, Gorakhpur aser Rishikesh nung aliba AIIMS nung facility aika semzüksüba den külemi facilities tasen yanglutsü atema lung azüngtsüogo. Lokti den jembidang Mandaviya-i, "India nung medical mapa ya commerce mapa masü saka tenzükba mapa ka lir," ta ashi. Paisa takok angur medical student tem dang sorkar den tezüngzüktep kecha magii kanga tezülen aliba tesentemi oa nüburtem tenzüksü ayongzük. "Ozü linük nungbo doctor temi tezüngzüktep ka agitsü menüngdak saka nüburtem

ajaki health facilities mangu tashi ni kü nem lemzüksüba tesem nung nüburtem tenzüksü, ta telemtetba agir," ta Union Minister-isa meetdaksü. Rajasthan kübok Thar lisem lima nung doctor tem aikati alitsü memelunger, aser iba dak sendakba nung Health minister-i doctor tem dang Rajasthan nung lisem aliba kanga tezülen tesem nung primary health centres (PHC) nung küm anabosa tenzüksü melungtetang, ta ayongzük. "Asenoki iba mangdangji yur inyakra 2047 küm tashi nungbo asen linük ya terenlok linük ka kümdaksütsü nükjidong yua aliba ya atangji ataloktsü," ta paisa shisem.



Tamalen tangokba noksa nung Ato kilonser, Narendra Modi aser BJP lenir tain, L K Advani na noksa nung angur. February 03, 2024 nü Modi-i BJP lenir tain aser taoba mapang Deputy Ato kilonser, Advani nem Bharat Ratna agütsütsü, ta sangdongogo.

Form No.3 [See Regulation-15(1)(a)]/16(3) DEBTS RECOVERY TRIBUNAL GUWAHATI Suwarna Bhawan, House No.12, New Town Path, Near Hanuman Mandir, G.S. Road, Ulubari, Guwahati-781007 (Assam) Case No.: OA/399/2023 Summons under sub-section (4) of section 19 of the Act, read with sub-rule (2A) of rule 5 of the Debt Recovery Tribunal (Procedure) Rules, 1993. Exh. No.: 4004 STATE BANK OF INDIA -VS- SHRI VITOSHE SEMA @ SHRI N VITOSHE SEMA To, (1) SHRI VITOSHE SEMA @ SHRI N VITOSHE SEMA SON OF LATE NIKHUPU SEMA H.NO 30 NEAR GB RESIDENCE V.S POINT OPPOSITE CRDS BLOK-B DAROGAPATHAR VILLAGE 2.5 MILE DIST-DIMAPUR NAGALAND - 797115. JAOKER 18.01.2024 anogo nung Hon'ble Presiding Officer/Registrar matsungdang OA/399/2023 benoka liasü. Rs. 2231862.48/- sentüh atema iba Act nung section 19(4) kübok application nung ajemdaker na anema (OA) benoka Hon'ble Tribunal-i jaokeer/ notice agütsür (application den documents copies densema lir). Iba Act nung section 19 kübok sub-section (4) nung ajemdaker na, defendants dang teküboklen aliba tetuyuba agütsür:- (i) Iba case defend asürtemi tajaba agütsüba sülen anogo semer nü tsüngda relief asoshi mepishibaji kechiba magütsütsüla, iba kuliji sayutsü metetdaksür; (ii) Original application nung serial number 3A kübok applicant-i shia aliba kiojen aser assets dak alia tanga kiojen aser assets sangdongtsüla; (iii) Original application nung serial number 3A kübok shia aliba kiojen aser assets ayoktsü mesüra item kiojen atema inyakshangshitsü memelar; (iv) Security interest atema inyakshangshiba dak alaka Tribunal dang nungi jelia temelaba magii original application nung serial number 3A nung shia aliba kiojen mesüra tanga assets ayoktsü, lease asütsü mesüra tanga kecha inyakshangshitsü; (v) Ordinary business ajanga secured assets mesüra tanga assets aser kiojen nungi yokzükba senji security interest soita aliba bank mesüra financial institutions indang account nung deposit asütsüla. Nü dang tezüluba nung sangdong applicant nem agütsütsü tuyur aser 26.04.2024 anogo nung anepdang 10:30 ako nung Registrar matsungdangi arutsü tuyur, yamaji meinyakra application ji angadangtsü aser na meliaka telemtetba agitsü. 19.01.2024 anogo nung tsünglanglen kü meyongnem den iba Tribunal indang seal agütsür: Registrar, Debts Recovery Tribunal, Guwahati.

### Sena lenir ana dak injang khaloktsü atema BJP MLA densema 3 apu



Shiv Sena lenir, Rahul Patil injang agi yiruba sülen Thane nung aliba Jupiter hospital ka nung amongdang tangokba noksa nung angur. Rahul Patil temang nungi injang trok agitotogo. Iba tatalokba dak sendakba nung BJP MLA, Ganpat Gaikwad den nisung ana pua lir.

Thane, February 03 (Agencies): Police station telung nung Shiv Sena Kalyan east city Tir, Mahesh Gaikwad aser party lenir, Rahul Patil na dak injang khaloktsüba tatalokba dak sendakba nung Ulhasnagar nung aliba Hill Line police-i BJP MLA, Ganpat Gaikwad densema nisung asem puogo. Nisung tepsettsü merangba aser Arms Act ozüng alema inyakba atema par asem apu. Police-i apuba tangar anaji Harshal Kene aser Sandeep Sarvankar na lir. Iba tatalokba sülen Mahesh Gaikwad aser Rahul Patil na Thane nung aliba Jupiter Hospital nung surgery agi; tena temang nungi injang trok agitotogo. Police-i ashiba agi, Hokolbar nikongdang BJP MLA, Ganpat Gaikwad'er jabaso Vaibhav Gaikwad-i Mahesh Gaikwad anema ken o ka benoktsü atema police station-i oa liasü. Kasa mapang nungji Mahesh aser Rahul Patil nata police station jagi aru. Iba sülen MLA Ganpat Gaikwad-a pa pusemertem den külemi police station jagi oa

liasü. Additional Commissioner of Police, Dattatreya Shinde-i, "Senior Inspector, Anil Jagtap indang takdang nung telok anaprongla jagi kati ka anema tai tongloktsütepa liasü. Iba mapang nungji kima telok ana pusemertem tsüngda rara tenzük. Asatepba ola angashia Jagtap kimai alu. Kasa mapang nungjisa Ganpat Gaikwad aser Kene nati Mahesh Gaikwad aser Rahul Patil na dak injang khaloktsü. Injang ola angashia Jagtap tanaben telungi aita Gaikwad nokdangtsü merangrang pa temeyong yiru," ta metetdaksü. Police-i Mahesh aser Rahul Patil naprongla Thane nung aliba Meera Hospital-i anir ao; aser iba hospital nungjagi maneni Jupiter Hospital-i anir oa surgery agia temang nungi injang agitet. Dattatreya Shinde-isa, iba tatalokbaji police station nung aliba CCTV camera nung tangoka lir. Video nungji BJP MLA, Gaikwad-i Shiv Sena lenir anaprongla dakji injang khaloktsür, ta ashi.



## TIR YIMYIM YIMOBILEM (EDITORIAL)

DIMAPUR AMUNGNÜ, FENRUARY (TSÜKLAI) 04, 2024

### Sarasademba ya terenemshiba mapa

**A**senoki aiben sarasademba ajanga Tsüngremi asen tia melentsütsü dang bilema sarasadem. Ajisüaka, Tsüngrem dang sarasademba ya asen ajungtsü dang bilema asen tia tajungba asütsü atema sarasadem masü saka asen taküm, kibong aser asen lima nung Tsüngremer sentong atalokdaktsütsü asoshi renemshiba mapa ka lir ta asenoki angatettsü junger. Ibaji kodang angateta sarasademdir, asen sarasadem ajanga asen nükjidong masü saka Tsüngremer nükjidong ataloktsü. Iba amaji kodang asenoki ochimulung agi amanga sarasademdir, Tsüngremi asenok ajanga Pa tashi amshia mapa inyaksü. Tenyartem mapang tenemnü benjong mapang atalokbatem asenoki bilemdangra, nütsüngtem külemi sentepa alidang aoksa kotak nungi mopong tesashi aonba ola ama Tsüngrem ain arubaji parnoki sarasademba agi masü saka parnoki sarasadema Tsüngrem sentong atalokdak shilem agitsü asoshi arua ataa aliba agi atalok. Asenoki sarasademba ajanga atalokba o asenoki Tsüngremi ashiba angaa Pa nükjidong ataloktsü asoshi sarasadema atadang atalokba na tetsüngda talanga ittepa lir. Par nütsüngtem dang Yisui Tsüngrem sentong ataloktsü asoshi kechalenia moi Yirusalem nung dang ataa liang ta ashiba Tenyar Mapa 1: 4-5 nung shia angutsü. Iba oji angaa nütsüngtem Yirusalem nung sarasadema ataa alidang Tsüngremi Pa nükjidong ataloktsü asoshi parnok amshitsü tenzük. Aji oda, kodang parnok sarasadem ajanga Tsüngremi parnok amshi tenzük, memetetika parnok temulung ka dang küma longjemadok aser parnok maparen ajak nung telemtetba agitsü asoshi Laishiba nung kechi shia lir ta angatettsü meranga Tsüngrem o bushitsü tenzük. Asen taküm ajanga Tsüngremer sentong atalokbaji yamaji ataloker. Ajisüaka, kodang asenoki Tsüngrem dang aseni mulungba ama aser aseni aginüba ama sentongtem atalokjang ta sarasademdir, idangjibo kecha mataloktsü aser Tsüngremiang asen sarasadem melangzür ama asenoki bilemstsü. Asenoki sarasadem saka melangzür aser meshir saka magütsür ta asübaji asenoki Tsüngrem mulungba nung masü saka asen mulungba nung amshitsü meshiba agi mataloker aser magütsür ta Yakob 4:3 nung shia angur. Iba amaji sarasademba ya Tsüngrem nem asen mulungba inyakdaktsütsü asoshi mepishir masü saka Tsüngremi mulungba asen taküm ajanga atalokdakjang ta mepishiba sarasadem asütsüla. Aji oda, Tsüngrem nükjidong ataloktsü asoshi asenok lumia sarasademtsü nungdakra lumia sarasademtsüla aser asen taküm ajanga Tsüngremi kechi inyaknür ta asübaji angatettsü merangtsüla. Asenokibo asen sarasademba ajanga yakta dang langka atalokba ngunüa yongyatsü akok saka Tsüngremibo asen tangatetba aser tamang jenjangji dang repranger. Laishibai ashir, Tsüngrem meimertem asoshibo tatalokba kechisarina ajak tajung asoshi dang ataloker (Rom 8:28). Aji oda, asenoki Tsüngrem meimra aser Pa dak amanga sarasademra, aseni mulungba ama masü saka Pai mulungba nung asen taküm aser kibong tia melenshitsütsü. Iba tangatetba nung asenoki sarasademba ajanga Tsüngrem ain agizüka amshir ta mebilemstsüla saka sarasadem ajanga asen taküm ajanga Tsüngremi Pa ain amshia mapa inyaker ta asenoki angatettsü junger. Asenok sarasadem nung "Nü mulung sang" ta shia atemba ya tapi masü saka asen mulungba nung masü saka Tsüngrem mulungba nung inyakang ta asenoki Tsüngrem tsüngdang ajemalua ashir. Karibo sarasadem nung Tsüngrem dang "Nü mulung sang" ta meshiner. Tetezü, Tsüngrem nem ozüng dang agütsüner aser ibaji ataloktsü imlar. Iba jagi Tsüngrem jashir asü mesüra menünua dang bilemar ashitsü makok, saka alima nung akaba ajak ya Tsüngrem meyong, anungji asen taküm aser lokti madaka asen mulungba agi masü saka Tsüngremi mulungba nung ketdang asütsüla. Tatsüba agi, sarasadem ya Tsüngremer sentong atalokdaktsütsü asoshi renemshiba maparen ka ta angatetra, aseni aginüba apia masü saka Tsüngremi mulungba atalokjang ta asenoki sarasademtetsü aser aseni meteta, ngua aser kongshia sayatenya mapa aika asen ajanga atalokdaktsütsü.

## OLEMSABANG

### Asen ajanga lokti ajangzükdaksür asü akoksadaksür?

- L.Kika Pongener

(Yashi adok nungi...)

Ano nisung ajaki kanga junga angatettsübaji, na aser ni-ji lokti nem tajangzük agutsüba nisung ka asü (?) Mesura petsaperong agutsüba nisung ka (?)...ta metettsü kanga tongtipang. Talisa, lennir kati metettsübaji, na aser ni-ji lokti timtemdaktsür ka masütsüla. Lennir karibo lokti nung pai/lai angatetbaji dang shitak...Anungji aji dang agitsü...ta tekong meranger. Ano lennir karibo pai/lai tenzükba loktiji akümtsüba tenzüktsü melena, lokti dang nungjagi pa/la-ang tuluba aser temaba ama bilema tenzük. Ano lennir karibo lokti temzüng-ozüng aser 'Guide-line' küpok tashi anga-a manidaknur aser meliteter. Lokti anitsü atema temzüng-ozüng 'Guide-line'-ji lokti indi mongdang nung tatsü-talang ajak asadanga jembir külen, telok teimbai mulongba nung teka mekhanga agizük, aser iba nungji züngsem ajungai tashi angaa anidaker. Ajisuaka, iba temzüng-ozüng 'Guide-line' küpok melitetba/manidaktetba lennir ka jagi loktiji tejakleni odaktsütsü melen teraksa-ang raksatsütsü. Ano lennir karibo lokti ajungtsü aser tejakleni odaktsütsü nukjidong masü, saka pei yangkü asungtsü, pei ajangzüktsü aser itasen/taa nung dang rangloker tenzük. Ano lennir karbo...Pa/la küpok tenzük shingaia pa/la den medenzüknur/manidaknur. Shin o ka nung ashir..."Captain without Soldier"...Sepoy tanidaker maliba tanishir (Leader) kaji takidak makaba lennir asütsü. Tanishir (Leader) ka pa/la sulen tanidaknur maliba aser tenzüknur malibaji tebilemdangtsü tuluka lir...!!!??? Tanishir ka pa/la den tenzüknur/tanidaknur melira... Pa/laji lennir tajung ka masü aser lennir ka asütsü metemsa.

Lennir ka atema sempet tamajungtemji...Jaklaliro tamajung, shisatsü tetokdak, tangatetba tila, taremsük maliba, ajak den küsa melitetba, tila mekümtetba, jembishinu nung tazükba mali...itemji asütsü. Iba ama lennir-i aniba loktiji kodanga sunepa/longjema malitsü. Lennir karibo pai/lai mulongba nung dang loktiji anitsü meranger. Ano lennir karibo pei dak alaka tangaribo kecha memetet ama...Lokti nung ken o telemtetba agidang, külem tenzük-ia koma bilemer (?) Kü tangatetba-bo ya danga...ta ashitsü melena...Aji meshitak...aji tai...yamaji tejembi...nai ashibaji magitsü...ta tangar akümmetsübui ozüng aguja jembiba jagi külem tenzük temulong yirudaksür. Ano karibo tangar jembiba anga-a malir, saka tangar tejembidak nung ajadanga jembir, ibala jagi tangar mesukshiba jakla-yimya sayur. Ano lennir karbo kanga tesashi...Pai/lai kechi ashir aji shitak, iba nungji külem tenzük kari nunga ta shira, pa/la den-jibo o-a mejembitsü ta asüba lennir karbo lir...Iba ama lennir-i aniba telok nungji tenzüknur/tanidaknur kata malitsü. Ano ajak dang tamajungbaji, lokti nung nisung ana-asemi dang ajetbanger, parnoki telung nung kechi renemer bener arudir, iba nungji shingaia nunga ta mashitsü (Syndicate)...Iba ama lennisuba nungji loktiji kodanga longjema malitsü.

Aji oda, na aser ni-ji kechi komala jenjang ka sudir suang, kechi koma-ka shia meteta liaka...tangar den liromedema litettsüla. Lokti tzüzüng-ozüng 'Guide-line' nung tashi angaa anidaktetba/litetba lennir ka asütsüla. Tensa tia ajak aremsüktetba lennir ka asütsüla. Pei ajangzüktsü bushiba lennir masütsüla, kechiyong lokti nung tenzükbaji pei ajangzüktsü atema tenzük masü, saka lokti ajangzüktsü atema tenzük. Lennir kati lokti atema inyakang pei nuja takoksa aremsüla. Lennir kaji lokti timtemdaktsür aser lemsadaksür ka masütsüla, saka lokti ajungtsü atema pei nuja takoksa arema tenzüktsüla. Lennir kaji pa/la lennisuba nung nubur ajaki pelaseta anidaknutsüsa alitsüla. Asen lennisuba mapang lokti atema mapa tajung tsüngnep karbo akatsüsa tenzüktsüla. Asen lennisuba mapang loktiji longjema aser yimjung nung lidaktsütsüla.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

# UK nung court kati sayutsüngir, Stephen Green aitsüogo



Sayutsüngir, Stephen Green-i tanur raksaba clinic ka kima Lai ozülu ka amer alidang tangokba noksa nung angur.

ya [abortion clinic] anema lir aser ibaji ajanga [PSPO] ozüing alema inyakogo," ta District Judge Kathryn-isa metetdaksü.

Stephen küm ka 'conditional discharge' kübok alitsü aser senchi pound 2,400 achitsü.

Iba ken o nung Stephen Green pusemer Christian Legal Centre (CLC)-i iba obendang anema temepishiba ken o agütsütsü tebilemba lir.

Stephen-ibo, pai senchi agütsüba dang nungibo tepuokdaki ang aitsü, ta shiogo.

"Khristan ka ama ni tesem ajak nung sadem-sadema sayutsüngitetsüla. Tenüngsang Ken 139 ya tebok nung tanur benlokba mapang nungi ajak Tsüngrem meyong akümba lai lir," ta pai ashi.

Paisa, "Buffer zones aser tang aitsüba obendang ya Laishiba aser o sadema jembiba anema lir, kechiyong linüki temelaba agüja lir. Ni kü ochi temeden atema nokdaksüba dak alaka ni asoshi tanga lenmang kecha mali," ta ashi.

Christian Legal Centre nung chief executive, Andrea Williams-i, "Tenüngsang Ken 139 ya Laishiba nung kanga nüngtugu Laitem rongnung ka lir, koba ajanga meimchir ajakji tesüngmangtsüka yanglu aser Tsüngremi anepalua repranger, ta ajak nem teimla aser anisüngzük agütsür," ta ashi.

"Judge kati, Tenüngsang Ken 139 nungi Lai tekong kaji longkak aitba mapa ka lir, ta jembiba aser temerenshi agütsütsü obendang agütsüba ya tejashitsüka lir," ta paisa ashi.

"PSPO ya Lai tekongtem aser sarasademba ya ozüing alema inyakba tesem ka kümdaksütsü atema yangluba ozüing lir. Iba ken o nung Green-i ochi temeden atema raradang onoki pa nungita yaritsü," ta paisa metetdaksü.

**February 03, 2024:** UK nung aliba abortion clinic buffer zone ka kima Khristan sayutsüngir kati Lai ozülu ka amer kazüba atema London nung aliba court kati pa aitsüogo.

Arrshi küm 72, Stephen Green-i MSI Reproductive Choices meyong tanur raksaba clinic kima Lai O zülu amer kazüba atema Ealing Council-i pa anema ken o benoka liasü.

Lai Oji Tenüngsang Ken 139:13 lir aser iba Lai tekongji yamai lir "Kechiyong Nai kü telung yanglu; kütsü no menden nung Nai ni yanger."

Iba abortion clinic ji Public Spaces Protection Order (PSPO) kübok lir, anungji iba clinic aser telongtet nungji sarasademtsü mesüra Lai azüngtsü memelar.

Iba abortion clinic nung inyaker kati, Stephen Green-i ghonda ka shi Laishiba amer Lai tashii azüing, ta metetdakja liasü.

Iba osang angashia police iba tesem jagi aru saka iba mapang nungjibo Green oadoker liasü.

Stephen Green ya Christian Voice nung Director inyaker.

Iba tatalokba ya ita tenet tejaklen atalokba liasü saka tawa Ealing Council-i pa anema ken o benokba sülen court nung ken o angadanga obendang agütsü.

Hokolbarnü (February 2) London nung aliba Uxbridge Magistrates' Court-i Stephen Green-i PSPO ozüing alema inyakogo, ta aitsü.

Ken o angadanga sülen obendang agütsüdang District Judge, Kathryn Verghis-i, Green-i tesünep nung longkak aityonga pai inyakba mapaji tim masü, ta metetdaksü.

"Tenüngsang Ken nung aliba lai 'kütsü no menden' ta asübjaji tanur raksaba anema lir. Kangabo mashishitsüsa Lai tekong aika lir, anungji nai item Lai tekong shim nung tajungba süla. Iba Lai tekong

atema inyaker.

Azam Masih-i Kotli Loharan Police Station nung Muslim nungertemji anema ken o ka benoka tatalokba ajakji metetdaksüogo.

Azam-i, "Ni Sunny Shah'er kidangi anir aoba sülen tenati insang amshia kü dak azük. Tenati kü dang Islam yimsü dangi meyipang, mesüra tepsettsü ta ni amokmerena liasü. Nadeem Masih dak-a kasaji inyak," ta metetdaksü.

Azam Masih-i sangdong ka ajanga, "Künati pei taküm kümzüksü atema dang tiyazü nung Islam yimsü dangi meyip. Künati Islam yimsü dangi meyipba sülen küna chiok aser iba tatalokba indang jembira tepsettsü ta küna

amokmeren," ta metetdaksü.

Adianu anaji Sialkot nung aliba civil hospital nung medical treatment agiogo aser police-i Muslim nung anaji puogo, ta CLAAS-i metetdaksü.

Iba tatalokba ajanga Pakistan nung Khristantem tsübuteper aser kanga jashir. Tang adianu anaji mimshia senzüba den külemi tenati ochi temeden bushidar.

CLAAS-UK Director, Nasir Saeed-i, iba tatalokba ya jungjunga bushisüngdangtsüla, ta metetdaksü.

Saeed-isa Pakistan sorkar dang iba tatalokba ya süoki ia agitsüla, kechiyong sorkari odang toktsüra Muslim

## ANOGO ABEN TSÜNGREM DEN

### CHICHIBA TEMULUNG MEYIPBA

*Aser pai apusoa tebu dangi aru. Saka pa tebui pa ngua aochia bilema asema ao aser tekong nung azüit aser tepang mesep. Luk 15:20*

Yisu Khrista dak amanger aika pei taküm nung tai temenen lenmang nungi temulung meyipa temelenshi taküm ka küma alitsü tenzükdanger, saka ano yakta dang atsüngzüka oa küsa tai temenen nung asonga temenen lar küma taküm lisaa aliba angur. Koda jabasoi kodang pei aibelen meteta aru, ni Tsüngrem aser kübu madang tatok nangzüksü nungdak ta shitet, aser idangyongjisa noktaker tebu kidangi apuso aser tebu ajurua tatok mepi. Pa aibelen tai temenen kecha mesükdangi tebui tatok agüja pa temang nung sobua aliba tejen sobutsü ajak tasen agi melenja pa taküm tia ajak tajungba küma melentsü.

Temeim medemertem, chichiba temulung meyipba tetezü, aseni toktsüba temenen den teti asoshi hai-haura kecha makai jungjunga pilaa litetbaji lir. Aseni shitakba ibaji ajangshia lir ma? Don Green, sayutsüngiri yamai shia sayutsüngi, "Tejenba taküm lenmang nungi taküm rangben pilabaji chichiba temulung meyipba lir."

Temeim oba, chichiba temulung meyipba majangshi tashi kü nela süngjema teyutsüma. Amen.

# Khristan adianu ana reshikangshia Islam yimsü dangi meyipdaksü

**February 03, 2024:** Pakistan linük nung Muslim nungertemi Khristan adianu ana puer oa reshikangshiba sülen kangshia Islam yimsü dangi meyipdaksü, ta United Kingdom nung amenoka aliba Centre for Legal Aid, Assistance & Settlement teloki metetdaksü.

Khristan adianu- Azam Masih aser Nadeem Masih na ya Pakistan nung Punjab province kübok Sialkot district nungi lir.

January 22, 2024 nü Muslim nung an-Qaseem Shah aser Sunny Shah nati Khristan adianu na puer ao, ta CLAAS-i metetdaksü.

CLAAS telok yagi Pakistan nung reshikangshi ajangshiba Khristantem

atema inyakba telok aikati Pakistan nung Tsüngrem mezüngmeshiba ozüngtem tim mesüi amshiba atema aitsür. 1987 küm nungi tenzüka tang tashi nung Pakistan nung iba ozüing kübok nisung 2,000 dak tema nem tai tongloktsüogo aser iba ozüing kübok tai tonglokja nisung 88 tepsetogo, ta Centre for Social Justice-i metetdaksü.

Pakistan nung Criminal Laws (Amendment) Act 2023 kübok Tsüngrem mezüngmeshiba ken o nung aibelenertem nem temerenshi tuluba agütsütsü, ajisüaka Khristantem densema minorities temeden kümzüka ayutsü atema latetba National Commission for Minorities Bill 2023 nungbo

ozüing tesashi mali.

amokmeren," ta nungertemi takoksa angur anaji anema inyaktsü, ta ashi.

Muslim nütsüng teimba aliba Pakistan linük nung Khristantem kanga reshikangshir. Talisa linük nung Tsüngrem mezüngmeshiba ozüing kübok Khristantem nem tai tonglokja apur.

Pakistan nung nütsüng shilem 1.5 dang Khristantem lir.

Yaküm August ita nunga Muslim nungertemi, Khristan anati Quran temeshi takaket raksatsüogo, ta tai tonglokja Tenla ki 20 dak tema rongdoktsüba den külemi Khristantem meyong ki noklang aika rongdokja liasü.

Meimchir temeden

AO OSHI ANGAZÜKDAK: TANÜ ANGAZÜKTSÜBA OJANG



Shishi

(v) sakadok (wake up)

\* Onok anepdang yakta shishi aser sarasademi ao.

Shishi

(v) osang metetdaksüyonga aoba (pass on message)

\* Amongbai asüng senden alitsü shishi.

OLONG PAITEP # 6687

Grid for OLONG PAITEP # 6687 with numbers 1-15 in various cells.

TIPLÉN

- 2. Sü jeplok - (4)
4. O agi merenshi - (5)
7. Ayongküm li - (5)
8. Chiyungtsü mapang süiadok - (4)
9. Tsüngrem den jembiba - (9)
12. Saklok - (4)
14. Samaba mebushitet - (5)
15. Mejanga onü - (5)
16. Tzü shiruru ka - (4)

LANGTSÜNGLEN

- 1. \_\_\_\_\_ i - (4)
3. Kasa masü - (6)
5. Nüchi masü - (5)
6. Tashi endok - (5)
9. Langtem - (5)
10. Anü malidang - (6)
11. \_\_\_\_\_ kibur - (5)
13. Tebur tembar tsüngda jatepba - (4)

OLONG PAITEP # 6686 TELANGZÜBA

TIPLÉN :

- 2. Yimten, 6. Aisü, 7. Jahaz, 8. Shin,
13. Meim, 15. Suyim, 16. Aiür,
17. Asüküm.

LANGTSÜNGLEN :

- 1. Injang, 2. Yehova, 3. Mezüng,
4. Nashi, 5. Rür, 9. Kümsük,
10. Tzüyim, 11. Teimla, 12. Yimra,
14. San.

NAI-A YA METETTER MA

Lok Sabha nung constituencies den state shia menden yamai lir :

Table with columns: State/ union territory, Gen., SC, ST, Total, Total (%). Lists constituencies for various Indian states.

Maneni asüng adok nung...

Assam CM-i RD parade NCC contingent den sensak asem



Guwahati, Tsüklai/February 3 (Agencies):

Chief Minister Dr. Himanta Biswa Sarma-i ashiba agi, lanurtem yimyayimpong yanglushitsü atema National Cadet Corps (NCC) ya sabang tajung ka lir. Assam nungi NCC cadet 171 shirnok Hokolbarnü 75buba linük Republic Day nung Lok Sewa Bhawan nung Republic Day Parade nung shilem agia liasü parnok den sensaksemba mapang Chief Minister-i ashiba agi, tebentet, training shitak agir aliba aser ajungmesor aliba lanurtem human resource ajungketba nung NCC-i teyari agütsür. NCC-isa lanurtem yimyayimpong yanglushiba nung teyari agütsür, shirok linük tejakdangi aotsü atema kanga tongtibang lir.

Contingent nem tenüngsang

agütsüba mapang Chief Minister-i, "state tenüng nungi Republic Day Parade nung shilem agiba kija jia tetushi tulu lir. Republic Day Parade nung shilem agiba mapang angazükbatem ya külem lanurtem ajungmesotsü atema cadet temi tejakdangi bener aotsüla," ta ashi. Dr. Sarma-isa, NCC cadet 171 ya lokti asoshi kanga tongbibang aser parnoki parnok taküm liyonga aoba mapang Rashtra Dharma aser Rashtra Bhakti indang tanüla sayutsüla, ta ashi. Maneni Chief Minister-i NCC cadet tem dang lokti nung temelenshi tajung bener arutsütsü atema taküm liyonga aoba mapang nükjidong tajung yur aotsü ayongzüka liasü.

Dr. Sarma-i ashiba agi,

lanurtem lenla balala nung lenir akümtsü asoshi anitetsü atema NCC ya sabang tajung ka lir. Paisa, NCC cadet tem dang süngtong atemba amala tsü mopung den apet mapatem benoka inyaksü ajungshi, aser iba ajanga parnok lokti aser tzü mopung dak sendakba nung khuret angatetba nisung kaka akümtsü asoshi teyari agütsütsü, ta shisem. Chief Minister-i, NCC ajungkettsü atema state sorkari jenjang tapet agitsü ta ashi. Sensaksemba sentong ayongzüka agiba mapang pa contingent züngsem tem nem tracksuits agüja liasü. Minister Sports and Youth Affairs Nandita Gorlosa, Major General Gagandeep Singh aser tanga lenirtem aikati iba sentong nung shilem agia laisü.

Manipur: Naga nungertemi azüzüktepa inyaksangshitsü ayongzü

Imphal, Tsüklai/February 3 (Agencies):

Naga nungertem dang nungi rakzükrakdemba, pur aoba, yimya yimpong tamajung beshiba, Naga nungertem sota bushisüngdangba amala inyakyimtem benoka inyakdar, ta UNC-isa shisem. Manipur kübok lenden nung Meitei nungertem aser tenem lima nung Naga nungertem kuki-chin kintem ta tongtibang kin asem alir. State nung nütsünyongsük shilem 53 Meitei nungertem aser Naga nungertem nütsünyongsük shilem 24 lir.

Naga nungertem dang nungi rakzükrakdemba, pur aoba, yimya yimpong tamajung beshiba, Naga nungertem sota bushisüngdangba amala inyakyimtem benoka inyakdar, ta UNC-isa shisem. Manipur kübok lenden nung Meitei nungertem aser tenem lima nung Naga nungertem kuki-chin kintem ta tongtibang kin asem alir. State nung nütsünyongsük shilem 53 Meitei nungertem aser Naga nungertem nütsünyongsük shilem 24 lir.

Naga nungertem dang nungi rakzükrakdemba, pur aoba, yimya yimpong tamajung beshiba, Naga nungertem sota bushisüngdangba amala inyakyimtem benoka inyakdar, ta UNC-isa shisem. Manipur kübok lenden nung Meitei nungertem aser tenem lima nung Naga nungertem kuki-chin kintem ta tongtibang kin asem alir. State nung nütsünyongsük shilem 53 Meitei nungertem aser Naga nungertem nütsünyongsük shilem 24 lir.

Manipur passenger train services February 7 nungi tenzükshtitsü



Imphal, Tsüklai/February 3 (Agencies):

Manipur nung tensa tera tajungba küma aoba mapang ka nung, Jiribam nungi Khongsang tashi km 55 shi nung passenger train service Feruary 7, 2024 nü nungi tenzükshtitsü atema Center aser state sorkar-i renemdar, ta ketdangsür kati

Honibarnü metetdaksü. Jiribam-Khongsang train service ya May 3, 2023 nü Manipur nung kin ana tsüngda mepetmesü tenzükshtitsü shibanga liasü. Chief Commissioner of Railway Safety (CCRS) Janak Kumar Garg-i anir railway

team kati Hokolbarnü 9:30 ako nungi tenzüka Jiribam nungi Khongsang railway station tashi lenmang asadangogo. Railway line tatembangbuba asadanga aodang team ya Jiribam railway station nung mapang tatsüka anenba sülen Khongsang-i aoba mapang Vangaichungpao ajanga o liasü. Bogey 14 bena aliba train ya Jiribam nungi tenzükshtitsü aser Manipur kübok Noney district nung amenoka aliba Khongsang railway station tonga o liasü. Team ya station manager Sinreap Gangmei-i agizüka liasü. Ministry of Railways-i Ayodhya, Uttar Pradesh-i temeshi aine aoertem atema February 7 nü special train ka anepalutsüogo.

# US-i Iraq aser Syria nung amak, Iran-i aitsür

**Tehran, Tsüklai/February 03 (Agencies):** United States-i Iraq aser Syria linük telung nung amakba ya "strategic error" lir aser iba ya ajanga Israel-i Gaza amakba ajanga Middle East nung tensa mejungi aliba tali ang tamajungba kumdaktsütsü, ta Iran-i ashir.

Deobarnü Jordan nung drone ka amshia amakdang America nung sepai asem tepsetba asoshi tayang kepzüka US sepaitemi Iraq aser Syria nung Iran-i yariba telungpur dak tayimtsü amshia Hokulbarnü amak tenzük.

Mapang tatsüka lir US Tir Joe Biden-i onoki shimtetba mapang aser tesemtem nung maneni amaktsü ta ashi.

Honibarnü Iran indang Ministry of Foreign Affairs odongtar Nasser Kanaani-i sangdong ka nung, US-i amakba ya Iraq aser Syria indang sovereignty aser litsü-lika temeden, international law nung aibelenba aser United Nations Charter nung aibelenba tejangja lir, ta shia liasü.

"Tang amakba ya Zionist yimli indang nükjidong yariba

dang lir. Iba ama amakba ajanga region nung US sorkar tali shilem agir aser Gaza nung Zionist yimli-i mapa tamajung inyakba amokbanger," ta Israel tenüng tetshia ashi.

"Tanen makai iba ama inyaksangshi ya region aser alima nung yimjung aser security asoshi timtem lir," ta ashi aser United Nations Security Council aser alima dang mepetmesü tuluba akumba nungi nokdangtsü ajungshia liasü.

Region nung tensa mejungi akumba aser timtem tera ya Israel yimli nungi aser iba yimli indang mitkari tanen makai Gaza amakba aser Palestine nung ajunga samatsütsü merangba nung US-i yariba ajanga lir, ta Iran sangdong ajanga ashi.

"Mepetmesü tera nung merangloki aser tangatetep kati marui region nung tensa tajungba dangi meyipa motettsü," ta ashi.

Middle East nung US mitkartem tesem balala nung amenoker küm aika arur. Iba region nung US sepai 30,000 shi lir. Iba den ano October ita Gaza

nung rara tenzük US-i khen atema sepai meyirijang aika den warships tem yoka lir.

Hokulbarnü US-i Iraq nung amakdang nisung 16 shi asü aser item rongnung civilian dena lir aser civilian aser security aliba tesemtem nung tenük yoker bomb poklokja amakdang nisung 25 yiru, ta Iraq sorkari Honibarnü ashi.

Linük nung lisem aliba region aser Iraq den arütsülen amakdang nisung aika asü, ta Syrian state media ajanga ashi. United Kingdom nung amenoka aliba Syrian Observatory for Human Rights ajanga ashiba agi, Syria nung Iran den sendaktepa aliba telungpur 18 tepset.

US Central Command (CENTCOM) ajanga ashiba agi, US nungi bombers tem aru aser Iran indang Islamic Revolutionary Guard Corps (IRGC) aser Tehran-i yariba telungpur indang command and control operations centres, intelligence centres, hadir ayuba tesemtem aser supply chain facilities densema tesem 85 dak tema nung precision munitions 125 dak tema amshia amak.

# Morok mi mechi Chile nung state of emergency sangdonga lir

**Santiago, Tsüklai/February 03 (Agencies):** Chile linük tiyonglen arem min nung morok mi adoka tesem balalai kaoloka aoba mapang state of emergency sangdongogo, kong nisung ter shi süogo.

"Morok mi den raratsü asoshi sepai ajunga yoka lir," ta Tir Gabriel Boric-i X nung post süja iba mera agiba sangdong aser tensa asadangtsü atema emergency services Honibarnü ajuruteptsü ta ashi.

Hokulbarnü nungi tenzüka morok mi yagi arem min hectares meyirijang aika rongdokogo aser tzükum len aliba yimitem mokoziü agi sünga Vina del Mar aser Valparaiso region tem nungi nüburtem pei

ki yutsür jena aor. Nisung ter shi süogo ta Valparaiso state ketdangtsüri ashi.

"Mopung ya ghonda ka nung mile 25-31 tsüngta aoner. Iba mopung ya tesashi, kechiaser iba mopung yagi süngo tu, kongsang mesüra süng oner aor aser mi tali jangrudaktsür," ta Valparaiso indang national forestry corporation director Leonardo Moder-i ashi.

El Nino tzüngsang ajaga tzüngsarusa aser anü tatsük agi mi ya adoka South America indang southern tsütsü kongshi aser scientist temia alima talemba akumba ajanga iba ama lendong ataloktsü tekumdangtsü shia lir.

Linük yimtiba Santiago southwest tsütsü Estrella aser Navidad jila tem nung mi agi nisung aliba ki 30 jungnüa rongdokogo aser nüburtem jena ao.

Valparaiso kisung nunga arem hectares 7,000 (acres 17,300) shi rongdokogo, ta Chilean national forest authority CONAF ajanga ashi.

Gari nung senzürtem taolem makai alirtemi tangokba noksa tem online nung prokshir, kong tenem-tekong tem mi agi sünger liasü.

Tang Chile aser Colombia nung temperatures tali akumer aser anogo ishika tsüngta Argentina, Paraguay aser Brazil nunga kongshitsü akok ta ashir.

## MENUNGRA BILEMTETER



**ASÜR TALINOKTSÜNG PONGEN**  
04.02.2023 – 04.02.2024

Anogo aser Putu süidema aotsü, saka ne mapa tajungtem teti onok den alitsü.  
- Kinungtsü, Chirnur, Semchir & Kinungertem

## TSÜRABUR TASOBA ANOGO



**Pangerwati Jamir (Mangmetong)**  
4th Feb 1944

Tsüngremer tesüngmangtsü taochi aser metemdangtsü makokba temeim nung ne taküm len ania aru nung Tsüngrem tenüng asanger. Kibubar maongka nung tensa, mapang aser alima yimya den liromedema litetbaji takoker taküm ka lir. Tanü asen Obala arishi küm 80 abensadang, onoki Tsüngremer yimlibilem bilemteter aser Pa nung tushir. Tesünep, tepela aser anema aliba den arishi talang temlojang ta onoki maneni sarasademtsür.  
Tepela Tasoba Anogo Salem, temeim Oba!  
-Temeim Kinungtsü, Chirnurtem aser semchirtem.

## MULUNGEN O



**Asür Retd. Chief Er. T.C. LONGCHAR**  
Aso: 09-09-1946 / Asü: 21-01-2024

"Ni rara tajungji raaogo, ni alizüng tonga asemogo, ni tamangji yuogo"  
2 Timoti 4:7

Asür T.C. Longchar mang yima aliba kinunger temi pa shiranga aliba mapang aser asüba mapang sarasadem, nübu aser rongsen agi onok den yariteper ajunga dang pelaba lemsateper. Talisa arogo, lokti tentet balala, Longkhum nung aser Eden Medical Centre Dimapur dang alia pelaba lemsateper.  
Nenek kija shia dang ozüi pelaba melemsateptetaka Tsüngremi nenok maneni moatsütsü onoki sarasademtsür.  
- Temeim kinungertem.

## Molungnen O



**R. IMSENCHUBA JAMIR**  
7.10.1979 - 27.01.2024

Onoki teti meima aliba R. IMSENCHUBA JAMIR ajungbena iba akümüli toktsür aoba mapang, kija, kibong, Arogo, Yimten aser temeimertem kwikati ozü asükho nung sarasadem, nübu aser rongsen agi yaritepogo, nenok ajak dang pelaba lemsateper. Nenek temeim aser mapa tajung onoki kodanga mamatsü. Teyanglur Tsüngremi nenok tali moajangma.  
-Temeim Kinungtsü, Chirnurtem aser Kinungertem.



Buenos Aires, Feb. 03: Argentina Tir Javier Milei-i bill ka benokba Congress nung jembidang sorkar anemer temi kima national flag ka ayipshiba noksa nung angur. Iba bill nungya rongsenketzung, administrative, mapa tamajung inyakba aser lipajen temelenshi indang sentong balala lir.

# Asian Cup: South Korea semifinal-i iogo



South Korea asayar Son Heung-min-i (abelen) tanabuba goal agütsür pelatepba yangi noksa nung angur.

**Tsüklai/February 3, 2024 (Agencies):** Tang asaya aliba Asian Cup nung Honibarnü South Korea aser Australia na asayaba mapang Son Heung-min-i mapang apuloktsür asayadang free-kick ka kanga junga idakja South Korea semifinal-i iogo aser parnok Jordan den asayatsü.

Asaya ya Korean-i akoktsü atema kecha timla maliasü, kechiyong parnoki minute 90buba tatem tashi nunga goal ka danga midaktsüteti liasü.

Asaya nung Australia team-i minute 42buba nung mezüngbuba goal idaktsü. Defence nung Hwang In-beom-i aibelenba ajanga

Connor Metcalfe-i Craig Goodwin nem ball agütsüteta goal idaktsü. Ajisüaka minute 96buba nung Son Heung-min dak box telung nung foul menaba sülen Hwang Hee-chan-i penalty idakja goal kasasa aküm.

Iba sülen mapang apuloktsür asayaba mapang minute 104buba nung Son-i box tema nungi free-kick ka kanga junga metsüa tanabuba goal idaktsü aser asaya koka liasü.

Asaya mezüngbuba shilem nung mapang apuloktsür asayaba mapang Hwang alandaktsüba atema Aiden O'Neill nem red card agütsü aser Australia team asayar 10-

dang asaya liasü.

Tang agi tasembenbuba Australia team Asian Cup quarter-finals nung tsükogo. Parnok tang agi pongubenbuba Asia Cup nung shilem agia liasü.

Qatar nung South Korea team-i junga masayatetba atema Jurgen Klinsmann kanga nungshia liasü, ajisüaka iba asaya akokba ajanga pa jenjang yanglushitsüogo.

Kasa mapang nung Jordan-i goal 1-0 agi Tajikistan koka semifinal tongtetogo. Australia akokba sülen Klinsmann-i aniba South Korea team yagi 1960 sülen taküm mezüngbuba Asian Cup akoktsü timla lir.

# Bangladesh & Sri Lanka format asemprongla asayaba asayamung ka asayatsü

**Tsüklai/February 3, 2024 (Agenies):** Bangladesh team taküm atema mezüngbuba March ita Sri Lanka den format asemprongla asayaba asayamung ka asayatsü renemdar, ta Bangladesh Cricket Board (BCB)-i metetdaktsü.

Iba asayamung nung Twenty20, One-Day Internationals (ODIs), aser Test ta cricket asaya format asemprongla asayatsü.

Twenty 20 asayamung ya March 4 nungi 6 tashi nung asaya asem asayatsü. Asaya asemprongla ya March 4 nü nungi tenzüka Sylhet yimti nung dang asayatsü.

Linük ana tsüngda One-Day International asaya asem asayatsü asoshi renema lir aser asaya asemprongla ya Chittagong yimti nung dang asayatsü. ODI asaya ya March 13 nungi tenzüka asayatsü aser 18 nü tembangtsü.

Maneni team ana tsüngda Test ana asayatsü. Test asaya mezüngbuba Sylhet nung March 22 nü nungi tenzüka asayatsü aser tanabuba Test ya Chittagong nung March 3 nü nungi tenzüka asayatsü.

Iba asayamung ya Bangladesh asoshi kanga tongtibang asütsü aser talisa Test asaya nung tongtibang asütsü, kechiyong kidang tang

mezüngbuba Sri Lanka team madak takok angutsü atema parnok nukjidong lir.

Kasa mapang nung ano Bangladesh team-i ODI series-a akoktsü merangtsü. Parnoki tatemsa 2021 küm Sri Lanka den kidang ODI asayababo koker lir.

Bangladesh Cricket Board-i formant asemprongla asayaba asayamung atema yonga ataba lemsatepogo aser cricket asaya meimertem atema-a March ita ya jangrademtsüka asütsü kechiyong Asian nung cricket kanga sapua asayaba linük ana iba asayamung nung temaba jenjang asoshi tokteptsü lir.



Indian Sepaktakraw tetsür aser tebur team-i Kathmandu, Nepal nung asayaba South Asian Sepaktakraw Championship nung Gold medal anana nguogo. Nagaland nungi coach ka aser asayar pezüi iba asayamung nung India tenüng nungi shilem agia liasü. Menenu aser Seyiekhrieno nati gold medal anana aser aser Sezovelu o Rukuvinu nati gold medal kaka angu. Holshe Khrieo, Indian Women team coach liasü.

# Marouane Fellaini asaya nungi anenogo

**Tsüklai/February 3, 2024 (Agencies):** Taoba mapang Everton aser Manchester United midfielder Marouane Fellaini-i pa asaya nungi anentsü asoshi telemtetba agiba osang sangdongogo.

Arishi küm 36 tain asayar shiba Belgium team nungi 87 ben aser World Cup ana tashi nung asayaogo pa 2019 küm linük team nungi asaya anena liasü.

Fellaini ya 2008 küm Standard Liege nungi Everton nung arua aden aser 2013 küm Manchester United-i ao aser iba sülen 2019 küm Chinese Super League club Shandong Luneng nung oa dena liasü.

"Ni kanga dang jangradema asayaogo," ta Fellaini-i social media nung post ka ajanga ashi.

"Ni meimba asaya ka

temaba jenjang nung asayatetba atema ni kanga pelar," ta paisa ashi.

Fellaini-i ashiba agi, pa asayaba club tem tenüng nungi asayatsü maongka ngutetba atema kanga nema danga bilemer aser 2008 Olympics, Euro 2016 aser 2014 o 2018 küm World Cup nung Belgian national team nung asayatsü maongka ngutetba ya tetushi ulura liasü.

Pa Everton nungi Premier League nung asaya 141 nung asaya aser iba mapang goal 25 idaktsüba den assist 14 süja liasü.

Maneni pa United nungi asayaba mapang asaya 177 nung goal 22 idakja laisü. United puri 2016 küm FA Cup aser 2017 küm Europa League aser EFL Cup akokba nung pai tongtibang shilem agia liasü.

# Jaiswal-i Test asaya nung tang mezüngbuba double century yangluogo



Yashasvi Jaiswal-i double century yanglubu sülen tepela sayuba noksa nung angur.

**Visakhapatnam, Tsüklai/February 3 (Agencies):** India nunger lanur asayar Yashasvi Jaiswal-i Honibarnü England den tanabuba test asayaba mapang tananübuba nung mezüngbuba double century ka yangluogo.

Pa tang agi Test asaya trokbuba nungang asayar aser India team-i over 102 nung wicket 7 out sür run 375 yanglubu nung pai tongtibang shilem agia liasü.

Iba alizüng tongtetba sülen Jaiswal ya Test asaya nung India nunger double century yanglur tanobosang rongnung tasembuba kümogo. Pai four 18 aser six tenet züka liasü.

Test asaya nung India nunger rongnungi double century yanglurtem rongnung tanobosangji Vinod Kambli lir. Pai arishi küm 21 asüba mapang 1993 küm England den asayadang double century yangluo liasü.

Double century yanglur

rongnung tanobosang den atongbaji Kambli, shibai arishi küm 21 aser anogo 355 asüba mapang Zimbabwe den asayadang double century anaben atonga yanglua liasü.

Kambli-i otsü tasen meyangu tsüngda Sumil Gavaskar-i iba record bener liasü. Pai 1971 küm West Indies den asayaba mapang mezüngbuba double century yanglua liasü.

Taoba küm West Indies den Test asaya nung India tenüng nungi mezüngbuba asayaba mapang Jaiswal-i run 171 yanglua liasü.

Iba asayamung nunga Hyderabad nung mezüngbuba test asayaba mapang pai run 80 yanglua liasü.

Tananübuba asaya tenzüka mapang pai run 179 yanglur liasü aser maneni run 28 yanglua liasü.

Asaya nung over 102buba Shoaib Bashir-i aonba mapang Jaiswal-i four ka aser six ka züka iba alizüng tongteta liasü.

## BILEMDANGANG

"Anema linüra chiyongtsüji mozü ama chiang."